

GUBBE GATELANGS

Å bli eldre har oftast det ved seg at kroppen knirkar.
Det kan enkelt løysast pr.sykkel. Og Eid er ein god stad å sykle.

Blues-preg / B for tonen H

G Em G Em G Em
 Det knir - kar og kna - kar, ___ men ett har eg greidd, å gå gjen - nom Ga - ta ___ på
 4 F6 G6..... G Em G Em G Em
 langs i Eid, men snub - lar eg ov - er ___ ein stubb og eit vers ein stad ut - i len - det ___ på
 8 F6 G6 C G C
 kryss og tvers... då sa - lar eg opp min hest, ___ ein ven - gje - hest ___ med du - gan - de pe -
 12 G G7 C G Em A A7
 dal - ar, og bjøl - le - klang ___ om ting og tang ___ for - løys - ast når tan - ka - ne
 16 D C Bm D7 G (Em.. G.. Em..)
 ta - lar til ein gub - de ga - te - langs.

Det knirkar og knakar, men ett har eg greidd,
å gå gjennom Gata på langs i Eid, - - -
men snublar eg over ein stubb og eit vers
ein stad uti lendet på kryss og tvers -
då salar eg opp min hest, ein vengjehest
med **dugande** pedalar,
og bjølleklang om ting og tang
forløysast når tankane talar
til ein gubbe gatelangs.

Eg fær langsmid fjorden med knirkande slark
og stoggar for leik i ein klatrepark. - - -
Og ungane hoiar, det ber over land:
«Sjå der kjem den syngande **GAMMAL MANN!**» -
då salar eg opp min hest, ein vengjehest
med **lystige** pedalar,
og bjølleklang om ting og tang
forløysast når tankane talar
til ein gubbe gatelangs.

Eg rek rundt i grusen ved Tverrgatas hus
og nynnar ein eldgamal gate-blues, - - -
eg tenkjer at dagen er godlyndt og grom
i heimstadens innarste hjarterom -
då salar eg opp min hest, ein vengjehest
med **tenksame** pedalar,
og bjølleklang om ting og tang
forløysast når tankane talar
til ein gubbe gatelangs.

Eg tenkjer at verda her hen ved ein fjord
er passeleg lita og passe stor - - -
så prins og prinsesse kan ta sine steg
og finne ei vise på allfarveg -
då salar eg opp min hest, ein vengjehest
med **knirkande** pedalar,
og bjølleklang om ting og tang
forløysast når tankane talar
til ein gubbe gatelangs.